

Uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarneq pillugu Inatsisartut inatsisaat nr. 12, 6. juni 2016-imeersoq.

Kapitali 1

Inatsisip atortuuffia

§ 1. Inatsimmit pineqarput:

- 1) Uumasut nappaataat inunnut tunillaassorsinnaasut, taakkulu akuutissartaat siaruaassinnaasut.
- 2) Uumasogatigiit nunatsinniittuunngitsut nujuartaatsinnut unammillersinnaasut uumasut nappaataannik taakkulu akuinik siaruarterisinnaasut pillugit malittarisassaliorneq.
- 3) Akiuiniarnissamat pilersaarutit.
- 4) Akiuiniariaatsit.
- 5) Nakkutilliineq.

Imm. 2. Uumasut nappaataat inunnut tunillaassorsinnaasut tamarnik taakkulu akui siaruaassinnaasut inatsimmi pineqarput, suliffeqarfinni inuussutissaleriffiusuni, uumasunik pingaarnertut tunisassiortuni, uumasuutini piniagassaniluunniit paasineqarneri apeqqutaatinnagit.

Imm. 3. Uumasut eqqiluitsumik pineqarnissaannut tunngasut inatsimmi pineqanngillat.

Kapitali 2

Nassuiaatit

§ 2. Inatsimmi matumani makku imatut paasineqassapput:

- 1) Uumasut nappaataat inunnut tunillaassorsinnaasut: Tassaapput nappaatit tunillannartullu uumasut inuillu akornanni toqqaannartumik toqqaannanngitsumilluunniit tunillaassinnaasut. Uumasunik toqqaannartumik attaveqarnermi nerisassalluunniit aqutugalugit tunillaassuuttoqarsinnaavoq.
- 2) Uumasut nappaataasa akui siaruaassinnaasut: Bakteriat, virusit, miluuffigisaminnit ilanngartuisut (parasit) uumasut inuillu akornanni tunillaassorsinnaasut sulluunniit.
- 3) Uumasut eqqiluitsumik pineqarnissaannut tunngasut: Uumasuutit nappaataannik, kiisalu nunalerinermi uumasuutini piniagassanilu nappaatinik pinaveersaartitsineq, nakkutiginninneq akiuiniarnerlu.
- 4) Uumasogatigiit nunatsinniittuunngitsut nujuartaatsinnut unammillersinnaasut: Uumasogatigiit pissusissamisoortumik nunatsinneersuunngitsut, takkunermikkut siaruaanermikkulluunniit uumasut assigiinngisitaarnerannik, inuit peqqissusiannik inuiaqatigiilluunniit aningaasarsiorderannik ulorianartorsiortitsisinnaasut.

Kapitali 3

Oqartussat

§ 3. Uumasunut Nakorsaqaqarnermut Inuussutissalerinermullu Oqartussat piginnaatitaasutut oqartussatut inatsimmik aqutsisuupput, kiisalu inatsimmi pineqartunik nakkutilliisuullutik.

Imm. 2. Uumasunut Nakorsaqaqarnermut Inuussutissalerinermullu Oqartussaqaqarfiup akisussaaffigai:

- 1) uumasut nappaataannik inunnut tunillaassorsinnaasunik taakkulu akuinik siaruaassinnaasunik akiuiniarnermut pilersaarusiornissaq,
- 2) paasissutissanik nuna tamakkerlugu akiuiniarnissamut pilersaarutitut atatillugu inernernik naliliinissamut pisariaqartinneqartunik katersinissaq,
- 3) uumasut nappaataat inunnut tunillaassorsinnaasut pillugit inatsisip eqqortinnissaanut nakkutiginninnissaq siunertaralugu Kalaallit Nunaanni suliffeqaqarfiit inuussutissalerisut tunisassianik uumasuneersunik tuniniaanissamik akuerineqarsimasut akuttunngitsumik misissuiffigisarnissaat, aamma
- 4) uumasut nappaataat inunnut tunillaassorsinnaasut taakkulu akuinik siaruaassinnaasunik akiuiniarnissaq siunertaralugu uumasunik uumasuutinillu pingaarnertut tunisassianik akuttunngitsumik misissuisarnissaq.

Imm. 3. Suliffeqaqarfiit inuussutissalerisut pingaarnerusumillu uumasunit tunisassiortut Uumasunut Nakorsaqaqarnermut Inuussutissalerinermullu Oqartussaqaqarfiup qinnuiginninneratigut suliaminnik naammassinnittarnerannut pingaarutilinnik paasissutissanik tamanik § 3, imm. 2, nr. 2-mi aalajangersarneqartunik tunniussisassapput.

Kapitali 4

Uumasoqatigiit nunatsinneersuunngitsut nujuartaatsinnut unammillersinnaasut

§ 4. Uumasut nappaataat inunnut tunillaassorsinnaasut taakkulu akuisa siaruaassinnaasut siaruarnissaat pinngitsoortinniarlugu uumasoqatigiit nunatsinniittuunngitsut avataaningaanneersut qaqugukkut qanorlu atugassaqaqarfitsilluni nunatsinnut eqqussorneqarsinnaanerannut Naalakkersuisut erseqqinnerusunik malittarisassiorsinnaapput.

Kapitel 5

Akiuiniarnissamut pilersaarutit

§ 5. Uumasut nappaataannik inunnut tunillaassorsinnaasunik nakkutilliinissaq misissuinissarlu kiisalu tunillaassuuttoqalinnginnissaa siunertaralugu akiuussusersuinissap nakkutilliinissallu qularnaarneqarnissaa Naalakkersuisut qularnaagassaraat.

§ 6. Akiuiniarnissamut pilersaarutit, taakkununnga ilanngullugit uumasut nappaataannik inunnut tunillaassorsinnaasunik taakkualu akuinik siaruaassinnaasunik nakkutiginninneq, misissuineq, akiuussusersuineq tunillaassortoqalinnginnissaa siunertaralugu qanoq iliuusissat pillugit Naalakkersuisut ersarinnerusunik malittarisassiorsinnaapput.

§ 7. § 6 naapertorlugu akiuiniarnissamut pilersaarutit:

- 1) uumasut nappaataat inunnt tunillaassorsinnaasut taakkulu akuutissartaat siaruaassinnaasut takutinneqarsinnaassapput, laboratoriami misissuinissamut, il.il., pilersaarusiornikkut
- 2) piginnaatitaalluni oqartussaasup suliffeqarfinnullu nerisassaleriffiusut, uumasunik uumasuutinillu pingaarnertut tunisassianut aqutsisuusut akornanni akisussaaffimmik agguataarineq aalajangersarneqassaaq,
- 3) uumasut nappaataannik inunnt tunillaassorsinnaasunik taakkulu akuutissartaannik siaruaassinnaasunik paasisaqartoqartillugu akiuiniarnissat sorliit aalajangiunneqarnersut allassimassaaq.

Kapitali 6

Akiuiniariaatsit

§ 8. Suliffeqarfinni inuussutissaleriffiusuni, uumasunik pingaarnertut tunisassiornerni, uumasuu-tini kiisalu piniagassani uumasut nappaataannik inunnt tunillaassorsinnaasunik taakkulu akuunik siaruaassinnaasunik annikillisaanissaq anguniarlugu akiuiniarnissamut periutsinik im-mikkut ittunik Naalakkersuisut aalajangiisinnaapput.

Imm. 2. Periutsit imm. 1-imi taaneqartut atorneqarnissaannut piumasaqaatit, taakkununga ilanngullugit uppersaatsit suleriaatsillu pisariaqartut pillugit malittarisassanik Naalakkersuisut akuersisinnaapput.

Imm. 3. Akiuiniariaatsit immikkut ittut ilaasa akiuiniarnissamut pilersaarutit ilaattut atorneqanginnissat pillugu Naalakkersuisut aalajangiisinnaapput.

Kapitali 7

Nakkutilliineq

§ 9. Uumasunut Nakorsaqaarnermut Inuussutissalerinermullu Oqartussaqaarfik uumasut nappaataasa inunnt tunillaassorsinnaasut taakkulu akuisa siaruaassinnaasut killilersimaarneqarnissat imaluunniit siaruatsaaliorneqarnissat anguniarlugu immikkut ittunik iliuuseqarnissamut inerteqquteqarsinnaavoq peqqussuteqarsinnaallunilu.

Imm. 2. Imm.1 aamma imm. 4 naapertorlugit iliuuserisassat imarisinnaavaat:

- 1) Uumasuutigisanut piniagassanullu tunngatillugit:
 - a) Immikkut misissuinerit,
 - b) nakkutilliinerit,
 - c) nalunaaqutsersuinerit,
 - d) nakorsaanerit,
 - e) akiuussutissalersuinerit,
 - f) immikkoortitsilluni mattussinerit,
 - g) uumasumik tunniussinissamut immikkut piumasaqaatit,
 - h) uumasunik toqutsineq, tassunga ilanngullugit tuniluuffiusup eqqaani toqutsineq imaluunniit immikkut ittunik piumasaqaatitaqartumik toqoraaneq, aamma
 - i) suujunnaarsitsineq.

- 2) Uumasunit tunisassianik kiisalu nerukkaatissanik, naggorissaatinik, kinnerinik atortunillu allanik tunillatsisimasinnaasunik:
- Immikkut misissuinerit,
 - suliarinninnerit,
 - nalunaaqutsersuinerit,
 - immikkut atuinissamut peqqussuteqarnerit,
 - immummik, manninnik uumasunillu tunisassianik allanik tunniussinissamut immikkut piumasasaqatit,
 - tunillannartuiaaneq,
 - nungutitsineq,
 - toqqortaateqarneq atortussaajunnaartitsinerlu, aamma
 - suujunnaarsitsineq.
- 3) Suliffeqarfinnut inuussutissaleriffiusunut aamma uumasunik pingaarnertut tunisassiortunut tunngatillugu kiisalu uumasuutitut atorpeqartussatut sanaartukkanut, illuutitut, maskiinaatigut assartuussutigisartakkanullu tunngatillugit:
- Aaqqissuussinissamut ingerlatsinissamullu immikkut piumasasaqatit,
 - eqqiaaneq tunillannartuiaanerlu
 - akuersissummik utertitsineq,
 - assiaqusersuineq, aamma
 - imermik kuutsitsinissamut aamma aalajangersimasumut kuutsitsinissamut inerteqquteqarneq.

Imm. 3. Peqqussut inerteqqulluunniit malinneqanngippat Uumasunut Nakorsaqaqarnermut Inuussutissalerinermullu Oqartussaqaqarfik nioqqutissanik peqqussuteqarfigineqarsimasunik imaluunniit inerteqqutigineqarsimasunik suujunnaarsitseqqusisinnaavoq, aamma uumasut napparsimasut akiuussutissamik kapineqarnissaannik toqunneqarnissaannilluunniit peqqussuteqarsinnaalluni. Suujunnaartitsineq, akiuussutissamik kapisineq toqutsinerlu suliffeqarfimmut piginnittumullu taarsiissutitaqanngitsumik akiligassanngortinneqassaaq."

Imm. 4. Naalackersuisut uumasut nappaataasa inunntut tunillaassorsinnaasut taakkulu akuisa siaruaassinnaasut killilersimaarneqarnissaat imaluunniit siaruatsaaliorneqarnissaat anguniarlugu immikkut ittumik iliuuseqarnissaq pillugu inerteqquteqarnissamut peqqussuteqarnissamullu malittarisassaliorsinnaapput.

§ 10. Uumasunut Nakorsaqaqarnermut Inuussutissalerinermullu Oqartussaasut uppersaammik atorsinnaasumik eqqartuussisumiillu aalajangiinertaqanngitsumik, inatsimmi matumani imaluunniit inatsit una malillugu malittarisassani aalajangersarneqarsimasunik suliasanik naammassinninnermi atorpeqartussanik paasissutissanik pissarsiniarlutik pisortat illuutaannut namminerisamillu illuutitut, sumiiffinnut, assartuutitut, niuertarfiup allagaataanut, pappiaqqanut il.il. , tassunga ilanngullugit aamma atortussianut elektronikki atorlugu toqqorneqarsimasunut sukkulluunniit isersinnaapput.

Kapitali 8

Naammagittaalliorneq

§ 11. Uumasunut Nakorsaqaarnermut Inuussutissalerinermullu Oqartussaasunit aalajangiiffigineqartut Aalisarnermut, Piniarnermut Nunalerinermullu Naalakkersuisoqarfimmut naammagittaalliuutigineqarsinnaapput.

Imm. 2. Naammagittaalliorsinnaatitaapput:

- 1) aalajangiinermi pineqartoq, aamma
- 2) kinaluunniit suliasap inernerata qanoq kinguneqarneranik nammineerluni annertuumilluunniit soqutigisaqartoq.

Imm. 3. Naammagittaalliornissamut piffissaliussaq tassaavoq ulloq aalajangiinerup nalunaarutigineqarfianiit sapaatit akunneri arfinillit qaangiutsinnagit.

Imm. 4. Naammagittaalliuuteqarneq Naalakkersuisut allamik aalajangiisimatinnagit kinguartitsinermik kinguneqassanngilaq.

Kapitali 9

Pineqaatissiissutit

§ 12. Inatsimmi immikkut allamik tunngavissaqarluni pineqaatissiissut sakkortunerusoq atorneqartariaqartoq isumaqartoqanngippat, arsaarinninnermik akiliisitsissummilluunniit pineqaatissinneqarsinnaavoq:

- 1) § 9, imm. 1 naapertorlugu aalajangiussanik malinninngitsoq, imaluunniit
- 2) § 10 malillugu nakkutilliinermi oqartussanik isertitsinngitsoq.

Imm. 2. Inatsisartut inatsisaat manna malillugu najoqqutassiani atulersinneqartuni najoqqutassani aalajangersakkanik unioqqutitsinermi akiliisitsinermik arsaarinnissuteqarnermilluunniit pineqaatissiinissaq pillugu malittarisassanik aalajangersaasoqarsinnaavoq.

Imm. 3. Inatsisitigut piginnaatitaasut pisussaataasullu Kalaallit Nunaanni pinerluttulerinermi inatsimmi maleruagassat malillugit pillaanermi akisussaatinneqarsinnaapput. Kalaallit Nunaanni Namminersornerullutik Oqartussat, kommuni kommunilluunniit ataatsimooqatigiiffiat unioqqutitsisuuppat Kalaallit Nunaanni Namminersornerullutik Oqartussat, kommune kommunilluunniit ataatsimooqatigiiffiat akiliisitaanermik pineqaatissinneqarsinnaavoq.

§ 13. Inatsimmik unioqqutitsisoq unioqqutitsinermi pisuunini nassuerutigippagu, piffissallu aalajangersimasup iluani akileeqqusissut qinnuteqarnikkut sivitsorneqarsinnaasup akilernissaanik nalunaaruteqarpat, Naalakkersuisut nalunaaruteqarsinnaapput suliaq eqqartuussivikkoortinnagu aalajangiivigineqarsinnaasoq.

Imm. 2. Imm. 1-imi nalunaarut taaneqartoq eqqarsaatigalugu Kalaallit Nunaanni eqqartuussisarnermi inatsimmi allakkamut unnerluussutaasumut piunasaqaatit pillugit aamma oqaaseqarnissamut pisussaaffeqannginneq pillugu aalajangersakkat taamatuttaq atuupput.

Imm. 3. Akiliisitsissut piffissaagallartillugu akilerneqarpat, imaluunniit akuerineqarnerata kingorna akilerneqarpat imaluunniit pillaatissaq atorneqarpat malersueqqinnissaq atorunnaassaaq.

§ 14. Akiliisitsissutit, Inatsisartut inatsisaat manna naapertorlugu imaluunniit Inatsisartut inatsisaat manna naapertorlugu najoqqutassat malillugit eqqartuussutigineqartut Nunatta Karsianut tutsinneqassapput.

Kapitali 10 Atortuulerfia

§ 15. Inatsisartut inatsisaat ulloq 1. juli 2016 atuutilerpoq.

Namminersorlutik Oqartussat, ulloq 6. juni 2016



Kim Kielsen